

### 38. KONFERENCIJA U LINZU

(12. – 15. 9. 2002.g.)

Već gotovo četiri decenije tradicionalno sredinom rujna mjeseca u glavnom gradu Gornje Austrije Linzu održavaju se *Internationale Tagung der Historiker / nnen der Arbeiten und anderer sozialer Bewegungen* (Međunarodni dani povjesničara radničkog i ostalih socijalnih pokreta), popularnog ITH. Starije generacije historičara, među kojima bivši suradnici našeg Instituta do 1974. – *Instituta za izučavanje istorije radničkog pokreta*, učestvovala su redovito sa svojim saopćenjima na sesijama ITH, dajući tako doprinos historiografiji nedovoljno izučavanih problema međunarodnog radničkog pokreta.

Ratna zbivanja s početka 90-ih godina naprasno su prekinula tu tradiciju. Veze našeg Instituta sa prijateljima iz Austrije nisu, usprkos svim tegobama izazvanim agresijom na Bosnu i Hercegovinu i 43-mjesečnom neviđenom opsadom Sarajeva, prekinute. Dovoljno je samo spomenuti da je broj 27, godina XXV iz 1991.g. naših *Priloga* tiskan uz pomoć austrijske vlade, van zemlje i dopremljen u Sarajevo kroz famozni tunel. Simbolično i te, za kratko vrijeme, prekinute veze ponovno su obnovljene odlaskom dr. Ibrahima Karabegovića (1995.g.) u Linz na 31. i dr. Tomislava Iška (1999.g.) na 35. Konferenciju ITH-a. I prvi i drugi boravak predstavnika Instituta bili su u funkciji obnavljanja "pokidanih veza", kojom prilikom su kolege iz Austrije, u granicama mogućnosti, pomogli suradnike *Instituta za istoriju* u Sarajevu što knjigama, što novčano.

Ove 2002. g. prema koncepciji univ. doz. dr. Paula Pasteura sa CERA Sveučilišta u Rouenu (Ruanu)- Francuska u organizaciji pomenute Konferencije, a uz podršku Federalnog ministarstva za edukaciju, nauku i kulturu Republike Austrije, Provincijske vlade Gornje Austrije, grada Linza, Austrijske federacije Trade Uniona i Friedrich Ebert Foundation Bonn organizirana je 38. tradicionalna međunarodna konferencija pod zanimljivim i pomalo intrigantnim naslovom: *Seksualnost, narodni slojevi i radnički pokret (Sexualites, milieux populaires et mouvement ouvrier – Sexuality, the Working Classes and Labour Movements)*.

Lista učesnika (108) i zemalja iz kojih su došli (čak 21), sa tri kontinenta, svaka za sebe je impresivna i svaka za sebe pokazuju da interes znanstvenika za okupljanje i aktivno učešće na Konferenciji, bez obzira na sve velike promjene u go-

tovo četiri posljednje decenije (političke i ideološke, prije svega), nije ni za jotu opao. Dapače. Zahvaljujući velikom iskustvu provjerene ekipe (Garscha Winfried i Schindler Christine, prije svih), posljednjih godina sve prisutnijoj dinamičnoj univ. prof. dr. Gabrielli Hauch, predsjednici ITH Konferencija se, rekli bismo, nalazi na uzlaznoj putanji svoje opstojnosti.

Izbor teme 38. Konferencije ITH, koncepcija, ideje i 26 prezentiranih priopćenja i diskusije koje su se vodile nakon svake tematske cjeline (dviju prije i dviju poslije podne) u cjelini su potvrdili opravdanost opredjeljenja ovogodišnjeg okupljanja historičara u tradicionalnim prostorima idealnog miljea za rad *AK Bildungsheim Jägermayrhof-a* smještenim izvan grada, ali sa isto tako idealnom vezom sa centralnom jezgrom Linza, koju krasi najveći glavni trg u cijeloj Austriji (Hauptplatz), sačuvana autentična arhitektura sa zdanjima u kojima su boravile i stvarale veličine poput Mozarta, Keplera, Erich Marie Rilkea, Brucknera... Znanstveni referati su se temeljili na vrlo širokoj skali pitanja seksualnosti (unutar različitih socijalnih i dominantnih političkih grupa, odnosno kontradikcijama koje su proizlazile iz svakodnevne prakse u različitim periodima, od kraja XIX stoljeća do naših dana, i u različitim zemljama). Akcenat je bio na pučkim, širokim slojevima. Saopćenja, kako ona temeljena na štampi, izvorima, anketama, analitička, kompleksna i sumarna odnosila su se na praktične aspekte određenih sredina, norme, seksualni moral, i na ideološke pozicije prihvatane od strane radničkih organizacija koje su pretendirale da predstavljaju određena društva.

Ono što bi trebalo posebno naglasiti je učešće na Konferenciji niza mlađih istraživača (ispod 35 godina) koji u sredinama iz kojih dolaze već obnašaju značajne funkcije, kao istraživači ili predavači, i čije su reference (objavljeni radovi, publicirane knjige, učešće na znanstvenim skupovima) toliko impresivne da zasigurno obećavaju svijetlu budućnost ITH-a.

Iz naše perspektive poželjeti je da se suradnici *Instituta za istoriju*, i ne samo oni iz Sarajeva, odazivaju pozivima iz Linza i tako nastave tradiciju veza sa ITH-om. Tim više i tim prije jer su nam domaćini ove godine izašli u susret određujući najnižu stopu kotizacije za učešće i omogućavajući solidan smještaj u popularnom *Jugendgastehausu* (za 27 EURA na dan). ■

Tomislav Išek